

Aavernik illersuineq piniarnerlu pillugit Namminersornerullutik Oqartussat nalunaarutaat

Piniarnek aallaaniarnerlu pillugit inatsisartut inatsisaanni nr. 12, 29. oktober 1999-imeersumi § 2, imm. 4, § 8, §§ 12-13, § 15, imm. 4, aamma § 17, imm. 2 aamma Pinngortitamik illersuineq pillugu inatsisartut inatsisaanni nr. 29, 18. december 2003-imeersumi § 5, imm. 1, § 35, § 36, imm. 2, § 60, imm. 2, aamma § 61 naapertorlugit aalajangersarneqarpoq:

Atuuffia

§ 1. Nalunaarummi uani nunami immamilu Kalaallit Nunaata oqartussaaffigisaanni aarrup (*Odobenus rosmarus*) illersorneqarnissaa piniarneqarneralu pineqarpoq.

Imm. 2. Kalaallit Nunaata Avannaarsuani Tunumilu nunamik uumasuinillu eqqissisimatitsinissaq pillugu aammalu Qimusseriarsuarmi uumasunik eqqissisimatitsivimmut isernissamut immikkut aalajangersagaqarpoq, taakkununga ilaallutik sumiiffinni piniarsinnaatitaasut kikkut piniarnermik ingerlatsisinnaanersut. Sumiiffinni taakkunani marlunni immikkut nalunaarutini aalajangersakkat aalajangersarneqarput.

Eqqissisimatitsineq

§ 2. Aarrit nunami aalisarnikkullu imartami Kalaallit Nunaata oqartussaaffigisaani eqqissisimatitaapput, taamaattorli § 3 takuuk.

Imm. 2. Piaqqat arnavissanik ilaqartut arnavissallu inersimasut nunami aalisarnikkullu imartami Kalaallit Nunaata oqartussaaffigisaani eqqissisimatitaalluinnarput, taamaattorli § 3 takuuk.

Imm. 3. Qaanaap kommuniani piaqqat arnavissanik ilaqartut arnavissallu inersimasut piniaqqusaapput, taamaattorli § 3 takuuk.

Imm. 4. "Arnavissat inersimasut" imm. 2 naapertorlugu tassaapput arnavissat tuugaavi kakkiviaanit nuisasut 15 cm-imik takinerusumik takinerusut.

Imm. 5. "Piaqqat" imm. 2 naapertorlugu tassaapput piaqqat, angissusii apeqquaatinnagit, arnavissanik inersimasunik ilaqartut.

Pisassiissutininik piffissanillu piniarfusinnaasunik aalajangersaaneq

§ 3. Naalakkersuisut aarrinik ukiumut pisassiissutininik aalajangersaasassapput. Pisassiissutit aalajangersarneqassapput nunat tamalaat isumaqatigiissutaat, uumassusilinnik misissuisut siunnersuinerat, atuisut ilisimasaat kiisalu Piniarnek Pillugu Siunnersuisoqatigiinnik tusarniaasimaneq eqqaamaniarlugit.

Imm. 2. Pinngortitaassutisimut tunngasut pissutigalugit angutiviaannarnut arnaviaannarnulluunniit

utoqqaassutsinullu aalajangersimasunut pisassiissutit killilerneqarsinnaapput, pisassiissutillu pisassiissutitut ikinnerusunut sumiiffinni killilinni pisineneqarsinnaasunut agguataarneqarsinnaallutik.

Imm. 3. Aarrit killilersukkamik piniarneqarsinnaapput nunap ilaani aalajangersimasuni ataani taagorneqartuni aaveqatigiit agguataarfigisimasaannut piffissanullu taaneqartunut:

1) Kitaani ukiukkut aarrit (Sisimiut-Attullu avataanni) 66 A-p (Kangerlussuup paavata kujataa) aamma 70°-30' N-p (Qeqertarsuatsiap avannamut kangimut nuua) akornanni 1. martsimiit 30. aprilimut, ullut taaneqartut ilanngullugit.

2) Kalaallit Nunaata Kitaata Avannaani aarrit sumiiffit 70° 30'N-p avannaaniittut (Qeqertarsuatsiap avannamut kangimut nuua) 1. oktoberimiit 30. junimut, ullut taaneqartut ilanngullugit.

3) Ittoqqortoormiit aamma Ammassallip kommuniini 1. oktoberimiit 30. junimut, ullut taaneqartut ilanngullugit.

Imm. 4. Ukiumut pisassiissutit tamatumunngalu atatillugu atugassarititaasut tusagassiorfinnut nalunaarutikkut Namminersornerullutik Oqartussallu internettimi nittartagaatigut tamanut nalunaarutigineqassapput.

Imm. 5. Ukioq pisassiiffusoq 1. januarimiit 31. decemberimut atuuppoq, ullut taaneqartut ilanngullugit. Ukioq pisassiiffusoq siulleq tassaavoq 1. august 2006-imiit 31. december 2006-imut, ullut taaneqartut ilanngullugit.

Pisassiissutininik agguassineq

§ 4. Piniarneq pillugu Siunnersuisoqatigiit pisassiissuteqarluni killiliussat pillugit tusarniaavigineqassapput. Pisassiissutit kommuninut pisassiissutitut agguataarneqarnerat Kalaallit Nunaanni Aalisartut Piniartullu Kattuffiata (KNAPK) aamma Kalaallit Nunaanni Kommuneqarfiit Kattuffiata (KANUKOKA) tusarniaavigineqareernerisigut piniarnermut Naalakkersuisumit aalajangerneqassaaq.

Imm. 2. Piniarnermut Naalakkersuisup kommuninut pisassiissutitut atatillugu pisariaqartumik allaffissornikkut aqutsineq kommuninut isumagisassanngortissinnaavaa.

Imm. 3. Paasineqarpat kommunimi pineqartumi unioqqutitsilluni aaffattoqarsimasooq ukiumi pineqartumi ukiumiluunniit pisassiivimmi tullermi kommunimut pisassiissutit piniarnermut Naalakkersuisup ikilisinnaavai.

Akuersissutininik tunniussineq agguassinerlu

§ 5. Inuit § 6 naapertorlugu akuersissummik tunineqarsimasut kisimik aaffanniarsinnaatitaapput.

§ 6. § 4 naapertorlugu kommunimut pisassiissutit eqqarsaatigalugit akuersissutininik normulersukkanik qinnuteqaateqartunut atuuttumik inuussutissarsiutigalugu piniarnermut allagartalinnut kommunimilu tassani najugaqartutut inuit nalunaarsorsimaffianni nalunaarsorsimasunut kommunalbestyrelse agguassissaaq. Qinnuteqaateqartut akuersissutininik agguassinnermi peqataasinnaassagunik qinnuteqaateqarnerminni atuuttumik inuussutissarsiutigalugu piniarsinnaanermut allagartaqassapput.

Imm. 2. Kommunimut aaffanniarsinnaanermut akuersissutit tunniunneqartut aaffanniarsinnaanermut qinnuteqaatinit ikinneruppata, imm. 1 takuuk, kommunalbestyrelsip aalajangissavaa akuersissutit qanoq agguataarneqassanersut.

Imm. 3. Kommunalbestyrelsip akuersissummik tunniussinnermut atatillugu immersuivissaq nalunaarummut ilanngunneqartoq tunniuttassavaa.

Imm. 4. Kommunalbestyrelse pisassiissutigineqartunik isumannaatsumik nakkutilliisitsissaaq.

Pisassiissutigineqartunik atuineq malittareqqissaarneqassaaq piniarnerlu ingerlaannartumik unitsinneqassalluni kommunimut pisassiissutigineqartut tamakkerneqarniariapata.

Imm. 5. Kommunalbestyrelsip kommunimut pisassiissutigineqartut tamakkerneqarpata Piniarnermut Naalakkersuisoqarfik allakkatigut saaffigissavaa.

§ 7. Akuersissutininik agguaassinermut oqartussaasup aalajangissavaa akuersissutit tunniunneqartut qaqugu aaneqareersimassasut. Akuersissummik pisimagaluartut atorsinnaanaguli imaluunniit atuiumangitsut, piaarnerpaamik akuersissut atorineqanngitsoq akuersissutininik agguaassinermi oqartussaasumut utertissavaat.

Imm. 2. Akuersissutit aaneqanngitsoortut utertinneqartullu agguaateqqinneqarsinnaapput imm. 1 naapertorlugu. § 6, imm. 2 naapertorlugu agguaasseqqittoqassaaq. Qaqugu agguaasseqqittoqassanersoq piniarfissaaq aallartitsinnagu kommunalbestyrelsip nalunaarutigissava.

§ 8. Akuersissut inummut namminermuinnaq atuuppoq allanullu tunniunneqassanani tunineqassanailu.

Imm. 2. Akuersissut ataaseq ukiumi pisassiivimmi akuersissummik tunniussiviusumi aarrimik ataaseraarsinnaatitsivoq. Piffissaaq piniarfiusinnaasoq akuersissummi takuneqarsinnaavoq.

Piniariaatsit

§ 9. Timmisartut, helikopterit qamutillu motorillit, snescooterit ilanngullugit, kiisalu angallatit 20 BRT/15 BT sinnerlugu angitigisut aaffanniarnermi imaluunniit piniarfissamut piniarfissamiillu angallatigineqassanngillat.

Imm. 2. Aaffanniarnermi taamaallaat qoorortuut minnerpaamik 30.06-imik (7,62 mm) sulloqqortussusillit atorineqaqqusaapput. Qoorortuut eqqarasuartartut nutsuinnartakkalluunniit aaffanniarnermi atoqqusaanngillat. Imassat aqerlortaqqanngitsut (nikkilit) kisimik akuerisaapput.

Imm. 3. Aaveq toqussutissaanik aallaaneqartinnagu kapineqaqqaartassaaq. Unaaq atorineqartoq avatamut puttaqummulluunniit ataatsimut arlalinnulluunniit pitunneqarsimassaaq taamaalilluni pisamik annaasaqarnissaaq pinngitsoortinneqarluni.

Imm. 4. Aarrup pisarineqartup neqaa, amia atorineqarsinnaasortaalu allat tamarmik piniarfimmiit angerlaanneqassapput qimatulineqarlutilluunniit. Pisaqarfik qimatsinnagu sinnikut peerneqarnissaat sapinngisamik isumaginiarneqassaaq.

Pisanik atuineq, tunisineq tuniniaanerlu

§ 10. Aaffattat tuniniaqqusaanngillat akuersissut naqissuserlugu kommunip allaffia nunaqarfimmiluunniit immikkoortortaq pisamik nalunaarsuereertinnagu, taamaattoqli imm. 3 takuuk.

Imm. 2. Pisanik aaffattalluunniit ilaannik tunisisoqassanngilaq pisisoqaraniluunniit akuersissummik piginnittoq akuersissutip assilineranut atsiorsimatinnagu. Akuersissutip assilinerani pisaq kommunimi oqartussanit nalunaarsorneqarsimasooq takuneqarsinnaassaaq.

Imm. 3. Taamaattoq kommunip allaffia nunaqarfimmiluunniit immikkoortortap ammanerata avataatigut tuniniaaneq aallartinneqarsinnaavoq allaffik ammarniariartoq nalunaarsuisoqarsinnaappat.

Imm. 4. Aarrup ilaanik tuniseqqinnermi tunisinermiluunniit tunisinermut atatillugu akuersissutip assilinerata atsiorneqarsimasooq naqissuserneqarsimasorlu ilaatinneqartassaaq.

Imm. 5. Unioqqutitsilluni aaffattaasimasup neqaa, amia pisataalu allat tunissutitut tigoqqusaanatillu pisiareqqusaanngillat.

Pisanik nalunaaruteqarneq nakkutilliinerlu

§ 11. Aaffattat tamarmik immersuivissaq nalunaarummut ilanngussaq atorlugu tikinnermi najukkami kommunimut nalunaarutigineqartassapput. Taamatuttaaq pissatat tamarmik nalunaarutigineqassapput. Pisaq nalunaaqutaqarsimappat radiukkulluunniit aallakaatitsissuteqarluni, taakku immersukkamut ilanngullugit tunniunneqassapput. Immersuivissaq immersugaq § 10 naapertorlugu akuersissutip naqissuserneqarneranut peqatigitillugu tunniunneqassaaq.

Imm. 2. § 10 naapertorlugu aarrup ilaanik tunisisoqassanngippat pisaq immersuivissaq atorlugu piaartumik najukkami kommunimut nalunaarutigineqassaaq.

Imm. 3. Aaffattat tamarmik taamatuttaaq PINIARNEQ-mut nalunaarutigineqassapput ukiumoortumik immersuiffissaq atorlugu.

Imm. 4. Pinaqatigiittoqarsimatillugu pisaq nalunaaruteqartussaaitamit toqqakkamit ataasiinnarmit, assersuutigalugu akuersissummik piginnittumit, nalunaarutigineqassaaq, piniaqataasimasut tamarmik aqqi inuttullu normui nalunaarlugit. Immersuivissakkut nalunaaruteqartussaaitap kisimi pisaq PINIARNEQ-mut nalunaarutigissavaa.

Imm. 5. Kommunalbestyrelsip qaammatit naaneri tamaasa immersukkat tigusimasani Piniarnermut Pisortaqarfimmut nassiuttassavai.

§ 12. Pinerluttulerineq pillugu inatsimmi tamanna pillugu malittarisassat naapertorlugit imminut illersortariaqarluni iliortoqartariaqarlunuunniit aaffattoqarpaa aaffataq tamarmi Namminersornerullutik Oqartussanut pigisassanngortinneqassaaq.

Imm. 2. Aaffattup tamanna ingerlaannaq piniarnermut pisortaqarfimmut nalunaarutigissavaa.

Kommunimi ileqqoreqqusat

§ 13. Kommunalbestyrelse kommunalbestyrelsilluunniit arlallit peqatigiillutik kommunip ileqqoreqqusaatigut nalunaarummi § 3, imm. 3 §§ 6-7 aamma §§ 9-10-mi aalajangersakkanit sakkortunerusunik aalajangersaasinnaapput kiisalu kommunip iluani sumiiffinni aalajangersimasuni piniarnerup qanoq ingerlanneqarnissaanut najoqqutassiorsinnaallutik. Kommunit ileqqoreqqusaat piniarnermut naalakkersuisumit atuutilersinneqartassapput.

Nalunaaqutsiineq annissinerlu

§ 14. Aarrinik nikinnaveersitsineq nalunaaqutsiinerlu aatsaat pisinnaapput piniarnermut naalakkersuisup akuersissuteqarneratigut.

Imm. 2. Aarrit, aaviaqqat ilanngullugit, Naalakkersuisut akuersissuteqarsimatinnaagit uumasuutigeqquneqanngillat imaluunniit Kalaallit Nunaanniit anniseqqusaanngillat.

Immikkut akuersissuteqarneq piniarnermullu piumasaqaatit sukumiinerusut

§ 15.

Piniarnermut naalakkersuisoq ilisimatusarnermut imaluunniit Kalaallit Nunaata piniagassatigut pisuussutaasa nalunaarsorneqarnerannut atatillugu nalunaarummi malittarisassat atortinneqannginnissaannik immikkut akuersissuteqarsinnaavoq.

§ 16. Piniarnermut naalakkersuisoq aaffanniarsinnaanermut atatillugu piumasaqaatinik aalajangersaasinnaavoq, tassunga ilanngullugu ilisimatuussutsikkut misissuinernut atugassanik aarrup ilaanik tunniussisarnissamut.

Pineqaatissiissutit

§ 17. § 2, imm. 1 aamma 2, § 3, imm. 3, § 5, §§ 8-10, § 11, imm. 1 aamma 2, § 12, § 14 aamma § 16-imi aalajangersakkat unioqqutinneqarnerat akiliisinneqarnermik pineqaatissiissutaasinnaavoq.

Imm. 2. Pinerluttulerineq pillugu inatsimmi arsaarinnittarneq pillugu malittarisassat taamatulli atuupput.

Imm. 3. Arrup ilaanik arsaarinnissutigineqartut qanoq atorneqarnissaat Piniarnermut Naalakkersuisumit aalajangiivigineqartassaaq.

Imm. 4. Kommunip ileqqoreqqusaani § 13 naapertorlugu atuutilersinneqartuni aalajangersakkanik unioqqutitsinerup akiliisitsissutaasinnaanera pisamillu arsaarinnissutaasinnaanera aalajangersarneqarsinnaavoq.

Atuutilersitsinermut ikaarsaariarnermullu aalajangersakkat

§ 18. Nalunaarut ulloq 27. oktober 2006 atuutilerpoq. Peqatigitillugu Namminersornerullutik Oqartussat aarrinik illersuineq piniarnerlu pillugit nalunaarutaat nr. 9, 5. juli 2006-imeersoq atuukkunnaarsinneqarpoq.

Namminersornerullutik Oqartussat, ulloq 27. oktober 2006.

Finn Karlsen

/

Amalie Jessen

Ilanngussaq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut